

INUIT ATAQATIGIIT

Inatsisartuni



UPA 2018/19
Nuuk, 19.05.2018
Múte Bourup Egede

Uunga siunnersuut: Inatsisartut aalajangiiffigisassaattut siunnersuut, Namminersorlutik Oqartussat oqaaseqaatissaattut, Kalaallit Nunaanni sulitilluni ajoqusersinnaanermut isumannaarineq pillugu inatsisip allanngortinneqarnera. (Utoqqalinersiuteqalernissamut ukiut qaffakkiartortinneqarnissaasa malitsigisaanik allannguut)

Aatsitassanut, Suliffeqarnermut Nunamullu Namminermut Naalakkersuisoq

Kalaallit Nunaanni sulitilluni ajoqusersinnaanermut isumannaarineq pillugu inatsimmik allannguilluni, Naalakkersuisut nalimmassaaniarnerat Inuit Ataqatigiit imak oqaaseqarfigissavaat.

Utoqqalinersiuteqalernissamut ukiut qaffakkiartortinneqarnissaannik Inatsisartut aaliangersimanerannit siunnersuut oqallisigisarput nalimmassaanerummat innuttaasullu sulitillutik ajoqusersinnaanerannut isumannaarinissamut qulakkeerinneqataasussaammat ilalerparput.

Siunnersuummik ilaliinitta saniatigut Naalakkersuisut qinigaaffimmi aaqqissuusseqqinnissanik sunik ilusersuiniarnerut pissangalluta utaqqigatsigit oqaatigissavarput. Utoqqalinersiuteqalernissamummi ukiut 65-iniit 67-inut qaffanneqarnerat aaqqissuusseqqiffiusimavoq.

Naalakkersuisooqatigiit isumaqatigiisumminni aaqqissuusseqqikkumaarnissanik ilimasaaripput. Aaqqissuusseqqinnerilli suunerinik toqqaannaq oqaatigisaqaratik. Tamatta isumaqatigiisutiginnaagunarparput qinigaaffimmi uani aaqqissuusseqqinnernik suliaqarnissatsinnik avaqqussaqaarsinnaannginnatta. Isumaginninnermi, akileraartarnikkut ineqarnermilu aaqqissuusseqqinnissat avaqqussinnaanngisatta ilaat eqqaaneqaarsinnaapput.

Inuit Ataqatigiit siusinnerusukkut oqariartuutigisartagarput naqissuseqqillugu oqaatigissavarput, aaqqissuusseqqinnissanut suleqataanissatsinnut piareersimalluaratta. Suliassaqaarfinnini aaqqissuusseqqinnerit sapinngisaq tamaat siammassissumik siunissamullu qulakkeerinniffiusumik toqqammaveqartariaqarmata, aaliangeriikkat sangujoraarfiugatik attanneqaarsinnaaqullugit. Neriutigaarpullu Naalakkersuisooqatigiit oqariartuutigisagut tusaalluarlugit suliaassani aggersuni illuatungiliuttunik akuutitsilluarlutik tusarnaarsinnaassuseqarlutillu suleqatiserinnittarumaartut.

Taamak oqaaseqarluta siunnersuut aappassaaneerreqannginnerani ataatsimiitsitaliamut susassaqaartumut ingerlatinneqassasoq inassutigaarput.